

易

林

釋

文

敘

漢焦延壽易林以六十四卦變而之四千九十六卦班志
不著錄隋志五行類有焦贛易林十六卷漢書儒林傳京
房受易梁人焦延壽云嘗從孟喜問易房以爲延壽易卽
孟氏學東觀漢記永平五年秋京帥少雨上御雲臺召尙
席取卦以周易卦林占之其繇曰蟻封穴戶黃本作蟻封
戶穴與集協
韻此依永樂大大雨將集明日大雨以詔書問沛獻王輔
輿引東觀漢記今易林震之蹇有此文漢世甚重其書亭林顧氏疑爲東
漢以後人撰託非也亭林謂其時左氏未立學官易林引
左氏語甚多又往往有漢書中事如長城旣立四夷賓服
交和結好昭君是福事在元帝竟寧元年晏案左傳當西
漢時雖未立博士賈誼已爲訓故河間獻王傳其學毛詩
故訓傳多依用之於易林何疑焉至昭君不必爲元帝時

事或取昭明之義如毛詩平王之類萃之臨曰昭君守國
諸夏蒙德此昭君又何以解焉且元帝之世延壽因當見
之矣漢書京房傳焦延壽字贛贛貧賤以好學得幸梁王
王其其資用令極意學既成爲郡史察舉補小黃令贛嘗
曰得我道以亡身者必京生也房以元帝建昭二年上封
事棄市死時年四十一元帝紀建昭五年明年春正月改
元竟寧賜單于待詔掖庭王檣爲閼氏匈奴傳元帝以後
宮良家子王檣字昭君賜單于延壽生歷昭宣元之時或
猶及見其事唐王俞序謂延壽當西漢元成之間必有所
據亭林謂延壽在昭宣之世亦非也易林學出西京末義
古奧非東漢諸儒所能依託流傳既久沿譌滋多舊有汲
古閣毛子晉本漢魏叢書何允中本近有黃丕烈重校宋
本黃本刻工完整售者爲之紙貴然晏以毛何本校之頗

有舊本不誤而黃本妄改之者則宋本亦未盡可據矣坤之豫曰盡我筋力胝蠶爲疾黃刻宋本誤作蠶比之大過云胝繭爲疾胝卽胼胝之胝蠶卽足繭之繭爲疾與上堅不可得合韻黃刻宋本疾字作候尤爲誤也需之兌曰杜飛門啓同人之夫同漢五行志京房易傳有城門杜飛事黃刻宋本皆誤作杜飛其誤甚矣乾之井云龍鳴岐野鼃應山淵漢書張衡傳龍鳴鼃應章懷注引易林龍鳴岐野鼃應于泉唐時古本如此黃刻宋本作驚鳴岐山龜應幽淵臆改無據不可從也顯之解云箕仁入室政衰弊極抱其彝器奔於他國黃刻宋本箕仁作飢人據史記西伯伐飢國滅之飢卽伐耆之耆旻案箕子與微子連舉故下用抱器奔國之事不必改作飢人以合於殷本紀也乾之咸云三人求橘反得大栗黃刻宋本作反得丹穴據史記巴

寡婦清事晏案復之大過云踰河求橘并得大栗可爲確證不必改作丹穴以合於貨殖傳也大畜之訟云哀相無極黃謂哀相當作衷相晏案毛本原文云靈公夏徵哀禍無極言其事可悲哀禍亂相尋無已於文自通不必改作衷相以合於左氏文也姬之晉云販鼠賣卜黃謂卜當作朴周人謂鼠未腊者爲朴晏案漢藝文志蒼龜家有鼠序卜黃於文爲順亦不必改爲賣朴以合於戰國策也畧舉一隅則黃本之失爲不少矣晏燁釋舊文用相讐校擇善而從無所偏主其有音義不明證之故書雅記疏其隱滯於所不知概從闕如仿陸氏經典釋文纂易林釋文二卷附著於後末學謗陋聊備遺忘尙冀有道君子斷而裁之謂其義焉咸豐四年歲在闕逢攝提格壯月山陽丁晏自叙

易林釋文卷一

山陽丁晏儉卿著

乾之第一

蒙 鵠鵠鳴鳩專一無尤 宋本作鵠鵠是何本亦鵠作
鵠毛詩傳鵠鵠枯物也爾雅釋鳥作鵠鵠郭注今之布
穀也

需 目瞶足動 各本同一本作日瞶誤蒙之類日目動
煩瞶說文瞶目動也如勻切西京雜記陸賈曰目瞶得
酒食太平御覽鑒戒引蔡邕廣連珠曰目瞶耳鳴近夫
小戒也

訟 龍馬上山 宋本作罷馬

小畜 所行造德宋本無此一句

謙 擔負差蹢踈跌右足 宋本擔作僮差作善蹢蹢

跌踈曲禮連步以上鄭注重踈跌也中孚之節云出門
踈跌差卽踈之省文

豫 民安得從 毛本云從一作存宋本作存當從之與
上源合韻

蠱 彭祖九子 大戴禮記陸終氏娶於鬼方氏產六子
其三曰篋是爲彭祖

噬嗑 不見白粒 翟云楚策黃雀因是以俯啄白粒作
甘者非

夬 黃鳥來葉 何本作來集當從之作葉字之誤宋本
作采葉翟本作采蓄皆臆改不可從

咸 三人求橘反得大栗 宋本大栗作丹穴非復之大
過云踰河求橘反得大栗與此文同魏志東夷韓國出
大栗如梨初學記引王逸賦曰燕薦朝濱之巨栗又引

辛氏三秦記武帝果園有大栗十五枚爲一斗漢書貨殖傳燕秦千樹栗蜀漢江陵千樹橘此其人皆與千戶侯等故下文以爲貴且富也 又女貴以富一本作女青非何本不誤

暍 暍雞無距 何本作𦉰雞宋本作弱雞說文𦉰目傷眇也叱支切韓愈短燈檠詩兩目𦉰昏頭雪白下文云翹折目盲當從毛本作𦉰

大壯 卻大牆壞 宋本卻作隙同

蹇 騎狔逐羊 集韻二十三魂豚狔狔同後又作騎豚經涉虎廬亡羝失羔 宋本作虎穴羝作羊

井 龍鳴岐山鼃應山淵 後漢張衡應問龍鳴鼃應李賢注引易龍鳴岐山鼃應於泉唐人避諱多改淵爲泉也宋本作鸞鳴岐山龜應山淵非也御覽引淮南子

萬畢術曰燒龍致隨原注取龍夜燒之則隨至

良 民怯伐惡 宋本作城惡 續松案左氏成八年傳云

道于莒與渠邱公立于池上曰城已惡宋本作城

也成九年傳云楚子重自陳伐莒圍渠邱城

潰奔莒莒城亦惡庚申莒潰楚遂入邾人我邦郭

漸 水為凶傷我寶 宋本凶作災寶作足 生其

本作難生子

豐 藩屏固衛 宋本作周衛

節 龍角博頰 宋本作博預非

中孚 舜生大禹石夷之野 翟云路史後紀系寇曰禹

生石紐山在西番界龍冢山之原長於西羌西夷之

也雒書曰有人出石夷首石紐之夷也 并治

宋本作并治

坤之第二

比 飛上喬木 宋本無此一句 又鼓其羽翼宋本作
升高鼓翼

小畜 五輶四軌 周禮大馭祭軌乃飲注故書軌爲輶
杜子春云軌當爲輶車軌前也說文車部輶輶較也從
車范省聲讀與犯同唐韻正軌字注引五輶四軌宋本
作五輶非

履 敝笱在梁魴逸不禁漁父勞苦連室乾口 宋本無
此一行履下接四足五角句

同人 析薪在剋 宋本無此一句

大有 遷延惡人 宋本作奸延非 又炎火爲殃宋本
作災火

豫 鉛刀攻玉堅不可得 睽之歸妹云鉛刀攻玉无不

鑽鑿韓詩外傳鉛刀畜之而干將用之不亦難乎漢書
賈誼傳鑊鄒爲鈍兮鉛刀爲銛後漢隗囂傳驚馬鉛刀
不可強扶班超傳而無鉛刀一割之用乎又盡我筋
力胝醢爲疾比之大過亦云胝醢爲疾與上得合韻宋
本作爲候誤胝謂胼胝醢卽醢字戰國策足重醢而不
休息注足傷皮皺如蠶繭也損之音云盡我筋力胝胝
爲疾正與胝醢同義何本胝作眠宋本醢作醢皆誤
隨舉袂覆目宋本作舉被非

觀北辰紫宮漢書李尋傳紫宮極樞通位帝紀孟康
曰紫宮天之北宮也極天之北極星也淮南子天文訓
紫宮者太乙之居也

剝南山大獲盜我媚妾太平御覽獸部引博物志蜀
中南高山上有物似獼猴長七尺能行健步名曰猴獼

一名馬化或曰猥獮同行道婦人有好者輒盜之以去
人不得知行者每經過其旁皆以其長繩相引然故不
免此能別男女氣臭故取女不取男去而爲家室其無
子者終身不得還十年之後形類之意亦惑迷不復思
歸有子者輒送還其家產子皆如人有不食養者母輒
死故無敢不養也及長與人不異皆以楊爲姓故今蜀
中西界多謂楊姓者率皆猥獮馬化之子孫時時有猥
爪者說文猥母猴也引爾雅猥父善顧猥持人也釋獸
今作猥郭注猥獮也釋文猥字亦作猥俱縛反

无妄 昧爲目病 宋本作昧爲目疾

大畜 典冊法書藏在蘭臺 漢書百官公卿表御史大
夫一曰中丞在殿中蘭臺掌圖籍秘書後漢書班固傳
除蘭臺令史遷爲郎典校秘書續漢書百官志蘭臺令

史六百石掌奏及印工文書文選宋玉風賦楚襄王遊於蘭臺之宮是古有蘭臺之名西漢因之

大過 痛癢疥常不屬遠 太平御覽癢引癩癢瘍疥

宋本遠作逮與上害合韻

難 齊魯爭言戰於龍門 漢書五行志春秋桓公十四

年御廩災董仲舒以爲先是四國共伐魯大破之於龍門注引韋昭曰魯郭門公羊桓十年冬齊侯衛侯鄭伯來戰於郎何休注龍門之戰不舉地也桓十三年公會紀侯鄭伯及齊侯宋公衛侯燕人戰齊師宋師衛師燕師敗績何注郎雖近猶尙可言其處今親戰龍門兵攻城池尤危故恥之疏引春秋說曰龍門之戰民死傷者滿溝也者主說此經故知之太平御覽人事部引春秋攷異鄭龍門之下血如江宋均注龍門戰在魯桓十三

年

咸 農人豐敵 宋本作豐敵非

遜 鷓鴣破斧 一本作破府誤 又賴旦忠德且謂周

公旦宋本旦作其非

大壯 乾溪驪山秦楚結冤 左氏昭六年傳楚令尹子

蕩帥師伐吳師于豫章而次于乾谿注乾谿在譙國城

父縣南楚東境溪谿同

晉 捌潔累累 玉篇手部捌呂結切捺也廣韻十七薛

捌埤蒼云捺也比之大有又作列潔累累宋本捌作捌

又嬖母術嫁 史記五帝紀索隱嬖母黃帝第四妃

說文作婁婁母都醜也楚辭九章婁母姦而自好死妄

之豫云東家中女婁母最醜漢之盛云嬖母畏畫

明夷 嘗瞰開門 井之鼎云嘗瞰開門左氏襄三十年

傳歲在陳嘗之口疏引孫炎云嫫嘗之歎則口開四方
營室東壁四方似口故因名云李巡云嫫嘗元武宿也
營室東壁北方宿名爾雅釋天營室謂之定嫫嘗之口
營室東壁也案焦氏明於星象故嫫嘗降婁諸宿屢見
易林開元占經石氏中官占引焦延壽曰攝提星近大
角若不居其故近戚有謀賊王者大角星角起揚光若
近帝席左右有以席害主者文昌動搖不如故三公誅
不乃后死石氏外官占引焦延壽曰天樓星上近柱王
者樓殿有飛不知其處若有大火燒之者傳說星入星
天下有祝詛人主者若有巫醫之害以入日占國魚星
明則河海水皆出天弓張天下盡兵主與臣相謀甘氏
中官占引焦延壽曰陰德星明太子伐主若有女主治
天下者傳舍星人紫微宮垣間外人來入漢宮害上若

邊兵六起人星不具王者有子不成而死星盡不見有
人傳相驚以詔事若有詐僞治者市樓星不見兵作於
市若遠人來入漢市以兵相害亢池不居亢度中則廟
有大怪以主司日見則主命終酒旗不見天下有燕大
喪酒以亡司怪星不行宮中有大怪若天下多怪物天
高星近井鉞大臣斬不乃高爲下下爲高左更星久動
搖王者以出必道之其不動者以出乃吉左更輻近尾
吉遠尾天下有爲害者流星占引焦延壽曰流星入北
辰兵大起玉海天文類景祐乾象書引焦延壽占皆輒
文之僅存者故備錄之

家人 姊妹本居 宋本作弟妹合居

睽 邯鄲反言父兄生患 史記呂不韋傳子楚秦庶孽
諸孫不韋賈邯鄲見而憐之事安國君及華陽夫人立

爲嫡嗣不韋取邯鄲諸姬有身子楚從不韋飲遂獻其
姬生子政又進嫪毐於太后許令人以腐罪告之是反
言也其後夷毒三族廢太后所生二子是父兄生患也
宋本作兄弟生患續案史記趙世家云主父初以長
子章爲太子後得吳娃愛之爲不出
者數歲生子何乃廢太子章而立河爲王吳娃死愛弛
憐故太子欲兩王之猶豫未決故亂起以至父子俱死
爲天下笑易林所謂邯鄲卽趙之國都父兄卽主父與
太子章反言卽廢立猶豫之事生患卽亂起俱死之事
也

益 鶴盜我珠逃於東隅 賁之噬嗑曰黃鶴失珠無以
爲明毛本作黃鶴古鶴鶴多通用孫柔之瑞應圖曰晉
平公鼓琴有元鶴二隻而下衛明珠舞於庭一鶴失珠
覓得而走師曠掩口而笑

犬 三姦成虎曾母投杼 戰國策魏策今一人言市有
虎王信之乎王曰否二人言市有虎寡人疑之矣三人

言市有虎寡人信之矣又秦策曾子處費費人有與同名族者而殺人告曾子母曰吾子不殺人織自若有頃人又曰曾參殺人頃之一人又告之其母懼投杼

震 三年生狗以戌爲母 一本作三牛案十二辰禽戌爲狗故以戌爲母也

艮 塗回道塞 宋本作塗遏

漸 採懷得蚤 說文蚤齧人跳蟲又古爪字或從蚤子皓切

旅 流潦滂霈 宋本潦作淹

兌 齊魯寇戰敗於犬邱 春秋隱八年宋公衛侯遇於垂杜注垂衛地左傳齊侯將平宋衛遇於犬邱杜注犬邱垂也地有兩名杜此說衛地非也齊魯敗宋乃在宋之犬邱非衛境也春秋隱十年公敗宋師於菅杜注齊

鄭後期故公獨敗宋昔宋地又左傳鄭子然侵宋取犬
邱杜注譙國郡鄆縣東北有犬邱城是大邱爲宋地也
既濟 少子入獄 宋本作小子

未濟 蝦蟆大王 宋本作蝦蟇代王

屯之第三

屯 兵征大宛北出玉關與胡寇戰平城道西七日絕糧
身幾不全 漢書匈奴傳高帝先至平城冒頓縱精兵
三十餘萬圍高帝於白登七日漢兵中外不得相救餉
高帝乃遣使間厚遺閼氏乃開圍一角

博 夏臺羑里文王所厄鬼侯輸賄商王解合 史記夏
桀召湯而囚之夏臺周文王囚羑里益易之八卦爲六
十四卦又紂以西伯昌九侯鄂侯爲三公九侯有好女
入之紂九侯女不意淫紂怒殺之而醢九侯徐廣曰九

侯一作鬼侯戰國策魯仲連曰昔者鬼侯鄂侯文王紂之三公也鬼侯有子而好故入之於紂紂以爲惡醢鬼侯呂氏春秋紂爲無道殺鬼侯而脯之潛夫論紂好色九侯獻女紂以問姐己姐己僞俯而泣白九侯之不道紂怒脯厥女而烹九侯九侯卽鬼侯也鬼九音相近震之大壯云鬼侯獸醢岐人悅喜

履 百足俱行相輔爲強 文選六代論百足之蟲至死不偃挾之者眾也注引魯連子曰百足之蟲至斷不蹶者持之者眾也

同人 三系維駑 宋本作三孫荷駑 又郭君受討宋本作邦君

豫 循高探麓 宋本作循皋

蠱 南巴六安石斛戟天 毛何本作南已大安字之誤

也宋本作南巴六安當從之案神農本草經石斛巴戟
天范子計然曰石斛出六安名醫曰巴戟天生巴郡及
下邳 薑老復丁 毛何本作巴老復一誤宋本作薑
老復丁史游急就篇長樂無極老復丁顏師古注家有
高年則謂其子孫免賦役也王應麟補注參同契云老
翁復丁壯黃庭經亦有此三字永錫難老也 又將薑
乃據宋本無此四字

觀 莊公築館以尊王母 一本作主母非春秋莊元年
築王姬之館於外左傳爲外禮也

剝 五神室屋 宋本作五神其舍 又空門完堅宋本
作宮闕光堅

死妾 鳴條之災北奔犬胡左衽爲長國號匈奴主君旄
頭立尊單于 觀之良曰北奔陰胡主君旄頭書伊訓

造攻自鳴條孔疏今河東安邑見有鳴條陌說文大部
狄北狄也木大種漢書匈奴傳匈奴其先夏后氏之苗
裔曰淳維唐虞以上有山戎獫狁獯鬻居於北邊師古
注以殷時始奔北邊又匈奴謂單于者廣大之貌也漢
官儀舊選羽林爲旄頭被髮先馳論語曰吾其被髮左
衽矣宋本災作圖明夷之升作鳴條之郊呂案史記天
頭胡兵也正義曰搖動若蹏
蹏者胡兵大起蹏旋字通

陰變爲陽女化作男 漢書五行志魏襄王十三年
魏有女子化爲丈夫京房易傳曰女子化爲丈夫茲謂
陰昌賤人爲王一曰女化爲男婦政行也開元占經引
紀年曰晉定公二十五年西山女子化爲丈夫春秋曆
潭巴曰賢人去位天子獨居則女化爲丈夫

大壯 冬采薇蘭地凍堅難 宋本作堅圻非案難與蘭

合韻不必改斥字與下北得合韻

晉 烏鵲嘻嘻天火將起燔我室屋災及妃后 案春秋

襄三十年宋災伯姬卒左傳或叫于宋太廟曰嘻嘻出
山烏鳴於亳社如曰嘻嘻甲午宋大災宋伯姬卒待姆
也杜注嘻嘻熱也皆火妖也釋文嘻嘻許其反說文引作
談談嘻嘻同宋本作鳥鳴

啜 莫與守牧 宋本作守牀

蹇 不見欣歡 宋本作所歡

損 過任誰孰 宋本無此四字

升 東山拯亂 宋本作救亂 役使休止 宋本作役

無休已

鼎 區脫康居慕義入朝 史記匈奴傳東胡與匈奴中
間有棄地莫居千餘里各居其邊爲區脫韋昭注界上

屯守處索隱引服虔曰作土室以伺漢人纂文曰土穴也漢書蘇武傳李陵復至北海上詔武區脫捕得雲中生口顏注匈奴邊境爲候望之室區讀曰甌同音一侯反脫音土活反西域傳康居國去長安萬二千三百里成帝時康居遣子侍漢貢獻

艮 三伏採芭 宋本作三夫採葩何本作芭 出君有得 宋本君作必史記秦本記初伏孟康曰六月伏日初也周時無至此乃有之正義曰庚日必伏庚者金故曰伏也初學記引陰陽書後夏至第三庚爲初伏第四庚爲中伏立秋後初庚爲後伏謂之三伏

漸 使我凶凶 宋本作使君

歸妹 君不慎護 宋本作恤護

旅 欲歸稻池 宋本池作食 爲矢所射 一本矢作

失非

巽 久客無休 宋本休作依 霖雨盛溢 宋本作雷

雨

渙 同枕其袍 宋本共作同

節 更立賢王 宋本作賢主

蒙之第四

坤 富如庶倉 宋本作敖倉

屯 安息康居異國穹廬 漢書西域傳安息國王治番

兜城去長安萬一千六百里烏孫公主歌穹廬爲室兮

建爲牆蘇武傳於軒王賜武畜服匿穹廬注穹廬種帳

需 范公陶夷善賈飾資東之營邱易字子皮 宋本作

陶夷史記貨殖傳范蠡變名易姓適齊爲陶夷子皮之

陶爲朱公營邱齊地也

比 豕生魚魴鼠舞庭堂 開元占經引京氏曰豕生魚
其邑大水又豕生野獸蟲魚飛鳥國有異事京房易傳
誅不原情厥妖鼠舞門占經又引京房曰鼠無故舞邑
門外厥君亡於庭中道其邑有大兵 雄俟施姜 宋
本作奸佞施毒

否 操秬鄉畝 宋本作操秬

豫 戰於城南 宋本作瀟湘

臨 鑿井求玉非卞氏寶 案卞氏謂卞和也新序荆人
卞和得玉璞而獻之荆厲王韓非子楚人和氏得玉璞
獻之武王刖其左足成王卽位又獻之刖其右足後漢
書趙壹傳注引琴操云卞和得玉璞以獻楚懷王三說
楚王不同

觀 黃玉溫德君子所服甘露晞暑萬物生茂 翟云禮

月令中央土天子服黃玉時季夏之月土潤溽暑

无妄 宋本末有因無所據四字

頤 重釋買芝 宋本作賀芝

坎 戰於阪泉蚩尤敗走 史記五帝本紀黃帝與炎帝

戰於阪泉之野與蚩尤戰於涿鹿之野遂禽殺蚩尤宋

本作戰於涿鹿

離 抱關傳言聾跛摧筋 翟云淮南子主術聾者可令

聾筋聾推之謂筋筋之俗也晏案推筋謂摩筋摧揉之

考工記治弓施筋聾者耳無聞跛者足不良使之專靜

習工業也王制云瘠聾跛躄百工各以其器食之翟以

摧筋爲折櫛非也

蹇 司錄憑怒 牟云司錄當作司祿翟云周禮天府注

司祿文昌第六星或曰下能也

損 切切怛怛 一本作切切恆恆誤 又黍稷之恩靈

輒以存左氏宣二年傳趙宣子舍於翳桑見靈輒餓問其病曰不食三日矣食之

天 天之所壞不可強支 國語引周詩曰天之所支不可壞也其所壞亦不可支也

萃 鼃羹芬香染指拂裳 左氏宣四年傳子公之食指動曰必嘗異味宰夫將解鼃公弗與子公怒染指於鼎嘗之而出

升 天福所鄧 宋本作豐 成子得志六二以興 翟云六二謂十二世也莊子胠篋田成子弑齊君十二世而有齊國

井 夏姒親附 宋本作夏姬非

艮 攫飯把肉以就口食 呂氏春秋任數篇孔子窮乎

陳蔡之間顏回攫飯中而食之對曰矣煤入甌中棄食
不祥回攫而飯之國語烝嘗不過把握

旅 譯重開牢 宋本作關牢

需之第五

蒙 三塗五岳陽城太室 左氏昭四年傳四嶽三塗陽
城太室九州之險也

師 復見空桑長生樂鄉 呂氏春秋本味篇有仇氏女
子採桑得嬰兒於空桑之中母居伊水之上故命之曰
伊尹宋本作空素誤

泰 楚靈暴虐罷及民力禍起乾溪棄疾作毒扶杖奔逃
身死亥室 公羊昭十三年傳楚靈王爲無道作乾溪
之臺三年不成楚公子棄疾脅比而立之然後令於乾
溪之役靈王經而死左氏昭十三年傳王縊於莘尹申

亥氏申亥以其二女殉而葬之何本宋本俱作亥室毛
本作仄室非

同人 交綏結和 翟云左傳文十二年乃皆出戰交綏
注古名退軍爲綏

盥 佩玉藻兮無所繫之旨酒一盛莫與笑語 左氏哀
十三年傳吳申叔儀乙糧於公孫有山氏曰佩玉藻兮
余無所繫之旨酒一盛兮余與褐之父睨之杜注藻然
服飾備也釋文樂而捶反蕊同毛本作藻非

噬嗑 教羊牧兔使魚捕鼠 淮南子主術訓狸不可使
搏牛虎不可使搏鼠原道訓使蟹捕鼠御覽引尹子曰
使牛捕鼠不如猫徃之捷皆言用違其道亦此意也太
平御覽獸部引作教牛逐兔牛類引此文則宋本作牛
也漢云羊子逐兔犬蹄不得

復 三卻夷傷 左氏昭十五年傳晉三卻害伯宗譜而
殺之韓獻子曰卻氏其不免乎杜注爲十七年晉殺三
卻傳

无妄 載璧秉珪請命於河周公作誓沖人瘳愈 翟云
史記魯世家成王病周公自崩其蚤沈之河

大畜 龙降庭堅爲陶叔後 左氏文十八年傳昔高陽
氏有才子八人龙降庭堅杜注庭堅卽皋陶字釋文龙
莫江反

恒 蝸螺生子深目黑醜 邇之刺同一本作蝸螺宋本
作蝸螺非說文虫部蝸鼻蒲盧細要土蟻也天地之性
細要純雄無子蝸或作螺爾雅釋蟲果贏蒲盧釋文果
本又作螺又作蝸同廣韻贏螺同陶宏景本草注謂蜂
黑色細腰故云黑醜也

遜 去如飛鴻避凶且東 謂周公征東事毛詩有鴻飛

東山之詩

井 百里甯戚應聘齊秦 案秦百里奚齊甯戚也

賡 卷舌遁世 宋本作卷領非翟云新論慎言天有卷舌之星人有緘口之銘所以警惕言防口訖也

異 晉平有疾迎醫秦國病乃大秘分爲兩豎逃匿育上伏於膏下和不能愈 左氏成十年傳晉侯求醫緩於秦未至夢疾爲二豎子居育上膏下此晉侯謂景公又昭元年傳晉侯求醫於秦使醫和視之疾不可爲此晉侯謂平公也

兌 牡飛門啟 漢書五行志成帝元延元年長安章城門門牡自亡函谷關次門之牡亦自亡京房易傳曰厥災水厥咎牡亡妖辭曰關動牡飛辟爲亡道臣爲非厥

咎亂臣謀篡谷永曰城門關守國之固將去故牡飛也
宋本作牡飛毛本作牡不誤漸之坤云牡飛門啟革之
豐云牡飛關啟皆作牡

小過 焱風忽起車馳揭揭 說文焱火華也以冉切毛
詩匪風發兮匪車偈兮毛傳發發飄風非有道之風偈
偈疾驅非有道之車漢書王吉傳是非古之風也發發
者是非古之車也揭揭者葢傷之也一本作竭竭非

訟之第六

師 柏氏客宿 漢書高帝紀上問縣名何曰柏人上曰

柏人者迫於人也去弗宿 輔案漢武帝故事云帝即位為徵行嘗至柏谷夜投亭長宿亭長不納乃宿逆旅 出謝客嚴舞作食平旦上去還宮易林所謂柏氏即柏谷也

履 梅植藿豆 毛本譌作樹芸豈豆何本不誤

泰 弱水之西有西王母 爾雅釋地觚竹北戶西王母

日下謂之四荒山海經穆天子傳俱有西王母事漢書
西域傳安息長老傳聞條支有弱水西王母亦未嘗見
也

否 數窮廓落困於厯室卒登玉堂興堯侑食 晏案厯
室謂舜耕稼時困於厯山之室其後與堯侑食也觀云
厯山之下虞舜所處躬耕致孝爲堯所薦正與此文同
翟注引史記樂毅傳厯室與此文無涉

同人 子鉏執麟春秋作經 春秋哀十四年經西狩獲
麟左傳叔孫之車子鉏商獲麟以爲不祥以賜虞人
大有 尹氏伯奇父子生離無罪被辜長舌所爲 巽之
觀曰伯奇流離恭子憂哀論衡書虛篇伯奇放流首髮
早白詩曰維憂用老趙岐孟子注伯奇仁人而父虐之
故作小弁之詩曰何辜於天親親而悲怨之辭漢書中

山靖王聞樂對伯奇所以流離下引詩我心憂傷惄焉如搗漢儒多以小弁爲伯奇詩伯奇尹吉甫子見文選笛賦注引琴操

胥 左手收杵 杵與槃同墨子帝堯篇書名竹帛琢戒杆杵與孟槃同宋本作左手牧牂

家人 松喬彭祖 一本松作從非

損 爭訟不已更相談詢 翟云談詢當作謨詢楚辭九思違羣小兮謨詢注謨詢恥辱垢陋之言也荀子非十二子無廉恥而忍謨詢注謨詢言辱也說文謨或從謨妬 安樂無憂 宋本下有君子撫民世代千秋

困 尼父望行 宋本作尼父望家

歸妹 目張耳鳴 漢書藝文志噫耳鳴雜古十六卷隋志梁有噫書耳鳴書各一卷

既濟 白雉羣雉慕德入朝 孝經援神契周成王時越
裳獻白雉班固詩啓靈篇兮披瑞圖獲白雉兮效素烏
師之第七

需 雀凍求粒誤入罔域 案罔卽羅網之網域卽罔罟
之罟毛詩傳九罟綬罔小魚之網也

訟 五孫季子宋本作王孫

否 羿張烏號發射天狼 案烏號弓名文選子虛賦左
烏號之雕弓史記天官書其東有大星曰狼下有四星
曰弧直狼天狼星也如羿射十日之類

謙 穿胸狗邦僵離旁春 山海經貫匈國其爲人匈有
竅海內北經犬封國犬戎國狀如犬郭注黃帝之後卜
明生白犬二頭自相牝牡遂爲此國言狗國也淮南子
墜形訓有穿胷民高誘注穿胷胷前穿孔連背博物志

穿胃人去會稽萬五千里後漢書帝高辛氏有狗名槃
瓠時犬戎兵彊乃募能得犬戎吳將軍首者賜以少女
槃瓠得之於是少女隨槃瓠升南山產子女繁盛翟云
爾雅釋地疏蠻其類有八李巡曰五曰穿胃六曰儋耳
七日狗軛八曰旁春

觀 虜豹禽越 中孚之巽云虜豹擒越漢書魏豹傳漢

王遣韓信擊豹遂虜之越謂彭越也宋本作禽說禽擒

古通用

昌案宋本作說亦通夏說事見淮陰侯傳韓信

也當從宋本
作說字爲是

无妄 江南多蝮 爾雅蝮虺博三寸首大如擘毛詩斯

于正義引舍人爾雅注蝮江淮以南曰蝮江淮以北曰

虺又引孫炎注江淮以南謂虺爲蝮一本作江旁非

咸 長尾委蛇畫地成河 噬嗑之復云長尾蜺蛇畫地

爲河又蛟蛇九子長尾不殆管子水地篇涸川之精者
生於蛟蛟者一頸而兩身其形若蛇其長八尺以其名
呼之可以取魚鼈此涸川水之精也類篇蛟蛟豈危切
水精也形如蛇紆曲長八尺

恒 徵詣北闕乃見宣室 漢書賈誼傳文帝思誼徵之
至入見上方受釐坐宣室蘇林曰宣室未央前正室也
解 三德五材 一本作王德

損 鄭忽失家 春秋桓十一年經突歸於鄭鄭忽出奔
衛

井 范子妙材戮辱傷膚然後相國封爲應侯 史記范
雎傳秦封以應號爲應侯范雎既相秦號曰張祿鄒陽
傳范雎摺脇折齒於魏卒爲應侯

歸妹 金玉滿匱 離之兌云金玉滿堂老子亦云金玉

綈堂

旅 空槽注猪豚彘不到 咸之困云空槽注器豚彘不
至姤之節云槽空無實豚彘不食毛詩執豕於牢爾雅
豕所寢槽郭注槽其所臥蓐藝文類聚引爾雅作所寢
槽廣雅槽圈也玉篇圈牢也方言豬關東西謂之彘其
子或謂之豚齊民要術凡以猪槽飼馬令馬落駒言空
槽以水注之無所得食故豚彘不至也 張弓祝鷄雄
鳩飛去劉向列仙傳祝雞翁者雒陽人居鄉北山下養
雞百餘年雞皆有名字千餘頭暮栖於樹盡日放散呼
名卽種別而至博物志祝雞公養雞法今世人呼雞祝
祝起此也說文弔呼雞重言之讀若祝說苑田讓曰猶
舉杖而祝狗張弓而祝雞矣雖有香餌而不能致害之
必也張弓彎弧雄鳩憚之卽飛去也

比之第八

蒙 彭生爲豕 案彭生事見左傳

訟 鴻飛降集 一本作鴻卵

小畜 把彈攝丸 一本作把斂非何本作彈井之蹇亦

云把彈攝丸

噬嗑 蒼梧鬱林 漢書地理志蒼梧郡武帝元鼎六年

開鬱林郡故秦桂林郡屬尉佗武帝元鼎六年開

頤 騰蛇乘龍 爾雅釋魚騰蛇郭注龍類也能興雲

霧而遊其中釋文騰字又作騰又作蠱並同徒登反荀

子勸學篇騰蛇無足而飛大戴禮記作騰蛇慎子飛龍

乘雲騰蛇遊霧 蘇秘案左氏襄二十八年傳云蛇乘龍

楊耗名也土虛而民耗不饑何爲宋鄭必饑元楊虛中也

龍歲饑逢逢年鼠饑凶民食草蓬必指此事而言

坎 恒山浦壽高阜所在 翟云漢書地理志常山郡靈

壽浦吾

家人 懿公淺愚不深受諫無援失國為狄所滅 案事

見左傳一本作懿恭非睽之師云懿公淺愚不深受謀

無援失國為狄所滅疏案列女傳仁智許穆夫人傳云初許求之齊亦求之懿公將與

許女因其傳母而言曰古者諸侯之有女子也所以苞

苴玩弄繫援於大國也今者許小而遠齊大而近如使

邊境有寇戎之附小一旦有大國之難孰可與慮社稷衛

侯不聽而嫁之於許其後狄人攻衛大破之而許不能

救衛侯於是悔不用其言易林所謂懿公淺愚不深受

諫無援失國為狄所滅者當即指此

夫 玉銳鐵頭 宋本作五銑鐵頭

困 思嚼牛羊 宋本作伺嚼牛羊

震 出值凶災逢五赤頭 晉書天文志天衝出如人蒼

衣赤頭不動故下文云不敢動搖

豐 李耳彙鵠更逢恐惜 廣雅釋獸於魑李耳虎也爾

雅釋畜彙毛刺釋文彙本亦作猓又作蝟說苑鵲食猓
猓食駮驥駮驥食豹豹食駮駮食虎言虎逢蝟則恐蝟
逢鵲則恐更相恐怯也一本作藥鵲字之誤宋本作更
相恐怯

換 一旅三關結緝不便 翟云結緝與同人相結合也
李白詩旅情初結緝蓋本於此

小畜之第九

訟 預且避網 案預且卽余且也莊子外物篇神龜能
見夢於元君不能避余且之網史記龜策傳漁者豫且
舉網得而囚之夜半龜來見夢於宋元王預豫同

泰 抱困縱釋 宋本作拘囚

剋 孔鯉伯魚北至高奴 史記項羽紀董翳爲翟王王
上都高奴大有之泰云禹將爲君北入崑崙皆假象之

辭不必實有其事也

鮑案伯魚未嘗至高奴此條必有訛誤當闕疑候考至於禹之治

水導源崑崙亦實有其事且釋文全書皆實事求是此條似不必以假象爲言

晉

牛驥同槽

文選鄒陽上書使不羈之士與牛驥同

皁注引漢書音義曰皁食牛馬器以木作如槽

明夷

狗無前足

爾雅釋獸豺無前足郭注晉太康七

年召陵扶夷縣檻得一獸似狗豹文有角兩足卽此種

類也釋文引字林云豺獸無前足似虎而黑 白鶴銜

珠夜食待明

王子年拾遺記云燕昭王時有黑鳥白

頭集王之所銜洞光之珠圓徑一尺此珠色黑如漆而

懸室內百神不能掩其精靈干寶搜神記噲參行遇元

鶴被傷乃收養之放去至一夜雌雄俱銜一明珠來報

按案白鶴銜珠夜食待明係小畜之萃繇詞當移於下文益之後漢之前

益

禹作神鼎伯益銜指

牟云益當作垂呂覽離謂周

鼎著倕而斲其指注倕堯之巧工也以巧聞天下周家
著鼎著倕於鼎使自齧其指明不當大巧爲也翟云淮
南子本經云周鼎著倕使御其指晏案莊子擺丁倕之
指而天下始人有其巧矣倕爲堯時之工禹鼎已著其
象不必如翟說改禹爲周也蓋禹鼎本有此制而周鼎
肖之

渙 鶉尾奔奔火中成軍號叔出奔 事見左氏僖五年
傳

中孚 魃爲旱虐風吹雲卻 詩雲漢旱魃爲虐毛傳旱
魃神也藝文類聚引韋曜毛詩問曰旱氣生魃魃鬼人
形眼在頂上

未濟 靈鳴督郵 漢書尹翁歸傳田延年爲河東太守
徙署督郵坎之渙云三足孤烏虛鳴督郵

履之第十

履 十鳥俱飛羿射九雌 楚辭天問羿焉彈日烏焉解
羽王逸注淮南言堯時十日並出草木焦枯堯令羿仰
射十日中其九日日中九鳥皆死案淮南本經訓有此
文又倣真訓注羿善射能一日落九鳥

頤 涉伯徇名棄禮誅身不得其道成子奔燕 左傳定
十年晉人討衛之叛由涉佗成何晉人遂殺涉佗成何
奔燕君子曰此之謂棄禮必不鈞

蠱 齊景或疑爲孺子牛 妬之震云爲孺子牛田氏主
咎左氏哀六年傳陳僖子使召公子陽生鮑子曰汝忘
君之爲孺子牛而折其齒乎而背之也杜注孺子茶也
景公嘗御繩爲牛使茶牽之茶頓地故折其齒案僖子
齊田氏陳乞也立公子陽生殺孺子茶故田氏主咎

否 貧如腐鼠而呼鴟鵂 翟云莊子秋水篇鵂得腐鼠
鵂雞過之仰而視之曰嚇釋文嚇亦作呼同

咸 烏鵲食穀張口受哺 牟云穀當作穀翟云爾雅釋
鳥生哺穀疏鳥子生母哺而食名穀

晉 共和政令君子攸同 史記周本紀召公周公二相
行政號曰共和索隱曰其如字韋昭曰疑之亂公卿相
與和而修政事號曰共和十二諸侯年表共和元年以
宣王少大臣共和行政

升 牧爲代守饗食甘賜得吏士意戰大破胡 史記李
牧傳李牧者趙之北邊良將也嘗居代鴈門備匈奴日
擊數牛饗士厚遇戰士破東胡降林胡

革 譌言妄語傳相註誤 說文言部註誤也戰國策韓
策註誤人主漢書景帝詔曰吳王謀爲逆註誤吏民王

篇註古賣切誤也

巽 筋勞力盡罷于沙邱 列子說符篇有九方皋穆公使求馬三月而反報曰已得之矣在沙邱

節 安上宜官一日九遷 蔡邕讓尚書表田千秋有神明感動一言以悟聖德昭發上心故有一日九遷

泰之第十一

履 方船備水傍河然火 一本作傍可非大有之謙亦作傍河爾雅釋水大夫方舟郭注併兩船方言方舟謂之潢注揚州人呼渡津舫爲潢荊州人呼杭音橫大有 生值地乳 翟云地乳醴泉也王勃九成宮序峯連地乳蓋本於此

謙 翁翁鞠鞠 宋本作鞠鞠文選魏都賦振旅鞠鞠玉篇車聲類篇鞠鞠同轡倫切羣車聲也作鞠亦通

隨 伯虎仲熊德義淵閎使布五教陰陽順序 左氏文
十八年傳高辛氏有才子伯虎仲熊使布五教於四方
賁 夏麥麩麩霜擊其芒 小過之解云夏麥麩麩霜擊
其芒歸妹之鼎云夏麥麩麩說文麩小麥皮也或從麩
玉篇麩大麥也麩同類篇麩麩麩同麩麥也胡光切毛
本作麩麩

剝 箕子爲奴干叔隕命殷破其家 案干叔蓋謂比干
或以干叔爲字之誤唐韻正引亦作干叔非誤字也
漸 巨貝爲室 一本作巨貝誤陳第毛詩古音考阜字
引巨貝爲室

歸妹 維邪南北所求不得 翟云儀禮大射儀中離維
綱注侯有上下綱其邪制中舌之角爲維

巽 澤狗水鳧 本草水獺一名水狗

節 龜戢河海 宋本作龜厭

未濟 寶沈參墟以義討尤次止結盟以成霸功

睽之坤曰寶沈參墟封爲晉侯臨之否曰唐邑之廬晉人以居虞叔受福寶沈是國左氏昭元年傳子產曰還寶沈於大夏主參唐人是因故參爲晉星

否之第十二

師 揚水潛鑿使石潔白衣素表朱游戲皋沃 翟云皋沃

一本作皋澤漢書地理志鵠澤注孟康讀告鵠澤卽詩從子于鵠之鵠詩揚之水素衣朱襮傳襮領也班固幽通賦張脩襮而內逼注引曹大家曰襮表也葢三家詩義

睽 來集六博三梟四散主人勝客 楚辭曰崑蔽象基有六博些成梟而牟呼王白些王逸注投六箸行六基

故爲六博也五白者博齒也韓非子博也者貴梟勝者必殺梟是殺其所貴也豫之復云奕棊六博

蹇 堅冰不溫凌人情怠 蠱之未濟云常冰不溫凌人怠惰太平御覽電引凌人情怠當从之情爲情之誤也周禮天官注凌冰室也

艮 牛生五趾 王充論衡武帝之時西巡狩得白麟一角而五趾漢書終軍傳從上幸雍獲白麟一角五蹄翟云五趾猶史記梁孝王傳牛足出背上也

兌 免冠進賢步出朝門 續漢書輿服志進賢冠古緇布冠文儒者之服也蔡邕獨斷公侯冠進賢冠戰國策秦王曰布衣之怒亦免冠徒跣以頭搶地耳漢書貢禹傳冠豈免安得復冠也遂去官

渙 娶於姜女駕迎新婦少齊在門之子悅喜 左氏昭

二年傳韓須如齊逆女陳無宇送女致少姜少姜有寵
於晉侯晉侯謂之少齊杜注爲立別號所以寵異之
小過 熊羆馘聖六師以昌 史記齊太公世家西伯將
出獵卜之曰所獲非龍非鰲非虎非熊果遇太公望於
渭之陽載與俱歸白帖引作非熊非羆

同人之第十三

履 箴石不祐 漢書藝文志醫經箴石湯火所施注箴
所以刺病也石謂砭石卽石箴也山海經高氏之山其
下多箴石注可以爲砥針治壅腫者箴與鍼針同

豫 按民呼池 毛本作湖池黃刻作呼池卽呼沱河也
禮記禮器作惡池周禮職方氏作虡池山海經作虡沱
戰國策作呼沱音義並同

大蓄 陶朱白圭三致千金 史記貨殖傳陶朱公十九

年之中三致千金德施上仁再分散與貧交疏昆弟此所謂富好行其德者也蓋天下言治生祖白圭白圭其有所試矣

革 正陽之央甲氏以亡禍及留吁烟滅爲墟 春秋宣十六年經春王正月晉人滅赤狄甲氏及留吁春正故曰正陽也

震 楚亭晨食韓子低頭 案韓子謂韓信也漢書韓信傳信從下鄉南昌亭長食亭長妻苦之迺晨炊蓐食食時信往不爲具食信亦知其意自絕去

大有之第十四

比 正居楚鳥 說文正足也古文以爲詩大雅字

部雅楚鳥也一名騭一名卑居秦謂之雅臣鉉等曰今俗別作鴉非是

小畜 一室十字 宋本作百子

晉 三豕俱走鬪於谷口白豕不勝死於坂下 升之晉
云二犬俱走鬪於谷口白者不勝死於坂下與此同意
皆假象之辭

姤 牝豕無豶歸居室家 說文豶牡豕也左氏定十四
年傳既定爾婁豬盍歸吾艾豶注婁豬求子豬也得牡
則定艾老也豶牡豕也史記秦始皇本紀夫爲寄豶豶
與豶同革之蒙云牝牛牡豶歸無室家

謙之第十五

師 邦傑載復送至東萊 一作邦桀載役牟云役復作
父翟云俱用伯兮詩義萊當作來東來爲王前驅所謂
自伯之東也

同人 驥駒在門

漢書王式傳歌驥駒注引大戴禮驥

駒在門僕夫具存

大過 荷囊載香盈我筐筥 剝之屯曰荷囊載擔香盈
筐筥禮記內則施縈表衿纓皆佩容具鄭注縈小囊也
容具香物也荷讀如負荷之荷

遯 桃雀竊脂來於小枝搖動不安爲風所吹 一本作

桃鵲非大雅肇允彼桃蟲毛傳鵲也旅之晉云鵲鵲竊

脂巢於小枝搖動不安爲風所吹藝文類聚鵲鵲引易

林桃蟲生蜩或云布穀生子鵲鵲養之鵲案爾雅釋

小雅小宛云交交桑扈毛傳云
交交小貌故易林與桃雀並言

升 七竅龍身造易八元 翟云言伏羲也伏羲龍身文

選魯靈光殿賦伏羲鱗身注引元中記八元八卦也

豫之第十六

同人 飢蠶作室緝多亂纏緒不可得 太平御覽蠶引

緒多亂纏端不可得昌索黃本垂飢作室昏多亂纏緒
不可得翟本飢蠶作室絲多亂緒

恒 梟鳴室北聲醜可惡 大雅爲梟爲鴟箋云梟鴟惡

聲之鳥爾雅釋鳥怪鴟注卽鴟鵂也

晉 任力德薄人命不佑 太平御覽楊柳引任力劣薄

天命不佑

姤 郭氏以亡國破爲墟 新序齊桓公出遊見郭氏之

墟野人曰郭氏善善而不能行惡惡而不能去是以爲

墟也桓石招野人而賞之焉

困 青蠅集蕃君子信讒 漢書武五子傳昌邑哀王爵

傳引詩至于藩今詩作樊毛詩樊藩也說文爻部作止

于柵林藩也

艮 登升大麓 虞書納于大麓鄭注山足曰麓麓者錄

也

暨 倉唐奉使中山以孝文侯悅喜擊子徵召 倉唐一

本作倉皇又作倉黃非也擊本又作繫形之誤也韓詩
外傳魏文侯有子曰擊次曰訢訢少而立以嗣封擊中
山三年莫往來其傅趙蒼唐曰父忘子子不可忘父何
不遣使乎臣請使文侯曰中山之君何好乎對曰好黍
離與晨風文侯曰怨乎曰非敢怨也時思也文侯大悅
曰欲知其君觀其所使遂廢太子訢召中山君以爲嗣

旅 文山蹲鴟 史記貨殖傳汶山之下沃野下有蹲鴟

正義曰蹲鴟芋也

疏崧案史記貨殖傳上文云唯卓氏

即鐵山鼓鑄富至僮千人司馬相如傳云臨邛中多富人而卓王孫家僮八百人易林所謂文山蹲鴟肥臚多脂王孫獲顯載福巍巍即指此事而言王孫即卓王孫也

隨之第十七

否 虎廬之里唐伯李耳 楊雄方言虎陳魏宋楚之間
或謂之李父江淮南楚之間謂之李耳自關東西或謂
之伯都應劭風俗通云呼虎爲李耳俗說虎本南郡中
廬李氏公所化爲呼李耳因喜

謙 顏叔子夏遊遨仁字 史記仲尼弟子列傳顏之僕
字叔鄭元曰魯人又卜商字子夏鄭元曰溫國卜商謂
遊聖人之門故曰仁字也

賁 大姒夏禹 一本作大似非

復 穆違百里使明厲武將帥襲戰敗於殺右 案穆謂
秦穆公百里謂奚明謂孟明也事見左氏僖三十二年
三十三年傳

頤 亡羊補牢 戰國策見兔而顧犬未爲遲也亡羊而
補牢未爲晚也

解 王喬無病狗頭不痛 列仙傳王子喬者周靈王之
子晉也蔡中郎集王子喬碑云好道之儔自遠來集其
疾痛𦵿擦者靜躬祈福卽獲祚若不虔恪輒顛踣謂祈
仙卽無病狗頭不痛如淮南王犬舐丹鼎皆得飛升也
翟云狗頭當作緱頭王子晉曰待我於緱氏山頭見列
仙傳

渙 天帝縣車 翟云淮南子天文訓爰止其女爰息其
馬是謂縣車

節 交川合浦遠溼難處 案交川卽交州漢書地理志
交趾郡屬交州又合浦郡武帝元鼎六年開

中孚 勾踐之危棲於會稽太宰譏言越國復存 宋本
作機言案國語越王勾踐棲於會稽之上太宰謂太宰
詔也事見越語

未濟 淫泆無側 一本作淫緇無測非

蠱之第十八

否 五段爲相 史記秦本紀吾媵臣百里奚在焉請以
五殺羊皮贖之

剝 羊腸九縈相推稍前止須王孫乃能上天 史記魏
世家魏伐趙斷羊腸拔閼與正義曰羊腸阪道在太行
上劉向新序趙簡子上羊腸之坂羣臣皆偏袒推車

復 蟬螻充側使人傾惑 爾雅釋天蟬螻虹也釋文蟬
丁計反本又作蠓同後漢書楊賜傳今殿前之氣應爲
虹蜺皆妖邪所生不正之象詩人所謂蠓螻者也注引
韓詩序曰詩人言蠓螻在東者邪色乘陽人君淫佚之
徵臣子爲君父隱藏故言莫之敢指

坎 褒后生蛇 漢書五行志厲王末繫流於庭化爲元

鼃劉向以爲夏后季世周之幽厲有龍鼃之怪近龍蛇
孽也

遯 四馬過隙時難再得 案四馬卽駟馬也鼎之大壯
云朝暮日月四馬過隙禮記三年問若騶之過隙然宋
庠國語補音陳古文隙字

蹇 執蕢炤犧爲風所吹 周禮司烜氏共墳燭庭燎鄭
注故書墳爲蕢先鄭云蕢燭麻燭也言執蕢燭以炤祭
祀之犧牲也毛本作執簣詩云左執簣傳簣笙也然於
炤字義不協當從宋本作蕢蕢乃蕢之誤字

姤 有蛇三足醜聲可惡 毛本作反蛇非戰國策曰蛇
本無足爾雅釋魚鼃三足能鼃三足賁郭注引山海經
從山多三足鼃大苦山多三足鼃左氏昭七年傳昔鯀
化爲黃熊入於羽淵釋文作黃熊如字一音奴來反亦

作熊能三足鼈也通雅引束皙發蒙記鼈三足曰熊任
昉述異記江淮中有獸名能音耐蛇精化也

革 雲夢大藪素有所在 周禮職方氏正南曰荊州其
澤藪曰雲 晉說文藪字注作雲夢

鼎 盧黃白脊 案上文云獐鹿雞兔此言其色盧謂色
黑也一本作蘆非 九辭十得 說文黼黻也或從辭
側革切

歸妹 荀伯遇時憂念周京 案毛詩作郇伯鄭箋郇侯
文王之子爲侯伯有治諸侯之功釋文郇音荀

旅 南山黃竹三身六日出入制命東皇宣政主尊君安
鄭國無患 穆天子傳天子命歌南山有雉乃紹宴樂
天子笙籥泮澤作詩三章曰我徂黃竹天子曰子歸東
土和治諸夏東皇蓋指此也又吉日丁亥天子人於南

鄭郭注今京兆鄭縣也穆王元年築祗宮於鄭國所謂鄭國無患也三頭六目疑敗獵所得異獸形

臨之第十九

乾 黃獮生子白戌爲母 初學記引字林曰獮韓良犬也戰國策作韓盧戌爲犬屬故白戌爲母宋本作生馬後文又云狗生龍馬

履 駕龍騎虎周遍天下爲神人使西見王母 穆天子傳觴西王母於瑤池之上北徂西土爰居其野虎豹爲羣乃生捕虎而獻之天子命之爲柙而畜之東虞是爲虎牢癸亥天子乘鳥舟龍卒浮於大沼郭注舟皆以龍鳥爲形制駕龍騎虎蓋謂此也

泰 胥恐之吳書策闔閭鞭平服荆除大咎殃 謂伍子胥鞭平王之墓事見左傳及國語

同人 管鮑相知至德不離 謂管仲鮑叔牙事見史記
管晏列傳

噬嗑 欽敬昊天宜授民時 案尚書作人時唐避太宗
諱改民作人漢儒引書皆作敬授民時

无妄 受讖六符 漢書東方朔傳願陳泰階六符以觀
天變不可不省藝文志天文家泰階六符一卷李奇注
三台謂之泰階兩兩成體相合故六觀色以知吉凶故
曰六符史記注應劭引黃帝泰階六符經唐錢起有泰
階六符賦 招搖空虛 史記天官書注引孟康曰近
北斗招搖招搖爲天矛索隱曰杓斗柄卽招搖也

頤 華首山頭仙道所遊 初學記引桓譚仙賦序曰華
山下有集靈宮漢武帝欲懷集僊者故名殿爲存僊門
爲望僊劉向列仙傳馬明生從安期先生受金液神丹

方入華陰山毛女在華陰山中體生毛

大過 憂思約帶 一本作約帶非也无妄之恒亦云憂

思約帶

鎮崧案復之節云管仲帶長憂思最苦即憂思約帶之意昌黎案約帶即古詩衣帶日以緩之意

邈 八百諸侯不期同時 史記周本紀是時諸侯不期

而會盟津者八百諸侯一本作六百非

晉 平國不君夏氏作亂烏號竊發靈公殞命 春秋宣

十年經陳夏徵舒弑其君平國左氏傳陳靈公與孔甯

儀行父飲酒於夏氏公出自其廐射而殺之案烏號弓

名射而殺靈公故云烏號竊發也隨之履云目傾心惑

夏姬在側申公顛倒巫臣亂國巫臣事見左氏成二年

傳

夬 青蛉如雲城邑閉門 爾雅虹蜺負勞郭注即蜻蛉

也方言曰蜻蛉謂之蜺蛉戰國策曰獨不見夫蜻蛉仰

承甘露而飲之自以爲無患與人無爭而不知夫五尺童子將調鈎膠絲加之四仞之上而下爲螻蟻所食崔豹古今注紺蝶一名蜻蛉好以七月羣飛天門海邊夷貊食之閉門一本作閉門又夬之泰云清冷如雲爲兵導先

震 折箬蔽目不見稚叔 宋本作折若師之蒙曰折葉蔽目蠱之屯曰折箬蔽日屏遮王目鵠冠子曰一葉蔽目不見泰山說文楚謂竹皮曰箬稚叔謂幼稚也渙之臨曰追亡逐北呼還幼叔

豐 麒麟騂耳 列子周穆王篇命駕八駿之乘左騂耳右騂赤騂漢書地理志周有造父得華騂綠耳之乘幸於穆王師古曰綠耳耳綠色史記秦本紀周繆王得騂耳之騂玉篇騂力足切騂騂駿馬節之泰云騂騂綠耳

章明造父既濟之乾云駢耳安全

觀之第二十

坤 疾病不醫下卽蒿廬 案蒿廬卽古樂府所云蒿里

豐之豫云命期終訖下卽蒿里一本作蒿蘆非

小畜 三子成駒折損輻軸 明夷之咸云三駒推車跌

損傷頤爾雅釋畜元駒哀騂郭注元駒小馬別名劉向
新序千年尚稚未有尺角騂駒而能服重致遠者也淮
南子脩務訓馬之爲草駒之時跳躍揚蹄翹尾而走人
不能制注馬五尺以下爲駒駒以服輶折損必矣

泰 黃池之盟吳楚爭強句踐爲患夷門不安 案會黃

池見左氏哀十三年傳晉人曰夷德輕越夷也故曰夷

門

隨 青蠅汚白恭子離居 宋本作其子案青蠅汚白謂

申生被讒也離之解云青蠅分白貞孝放逐左氏僖十年傳晉侯改葬其太子禮記檀弓作恭世子

邲 邲門內崩賊賢傷仁暴亂狂悖簡公失位 左氏哀十四年傳齊簡公之在魯也闕止有寵焉陳成子憚之子我歸屬徒攻闕與大門皆不勝乃出陳氏追之殺諸郭闕成子將殺大陸子方陳逆請而免之以公命取車於道出邲門杜注邲門齊城門也又甲午齊陳恒弑其君壬於舒州杜注王簡公也宋本作賊傷賢人古仁人通用

明夷 企立望采 毛詩誰謂采遠跂予望之跂與企同家人 當風失道 一本作悞道誤何本作失

困 三蟲作蠱 左氏昭元年傳于文皿蟲爲蠱說文蠱腹中蟲也從蟲從皿皿物之用也 勝母盜泉居不安

處 漢書鄒陽傳故里名勝母曾子不入邑號朝歌墨
子迴車師古曰曾子至孝以勝母之名不順故不入也
釋史引尸子曰孔子至於勝母縣暮矣而不宿過於盜
泉渴矣而不飲惡其名也太平御覽地部引論語撰考
識曰水名盜泉孔子不漱里名勝母曾子斂襟

兌 膾腩默蒼秦伯受殃 宋本作黥蒼毛本受殃作舜
殃誤廣韻二十二昔膾肥也伊昔切六脂臙腩醜也渠
追切儀禮士虞禮取諸左膾上注膾臙肉也淮南子脩
務訓臙腩哆鳴遽條戚施雖粉白黛黑弗能爲美者嫫
母此惟也

噬嗑之第二十一

坤 甲戌己庚隨時運行 案禮記月令正義引易林云
震主庚子午巽主辛丑未坎主戊寅申離主己卯酉艮

主丙辰戌兌主丁巳亥今易林無此或解說易林之文或費直崔篆許峻庾詵諸家易林未可知也

訟

大蛇巨魚戰於國郊

剝之艮云巨蛇大鱗戰於國

邦左氏莊十四年傳初內蛇與外蛇鬪於鄭南門中內蛇死六年而厲公入漢書五行志左傳文公十六年夏有蛇自泉宮出劉向以爲近蛇孽也京房易傳曰立嗣子疑厥妖蛇居國鬪水經注黃帝時大霧三日帝遊洛水見大魚煞五牲以醺之續漢書五行志魚孽靈帝熹平二年東萊海出大魚二枚長八九丈高二丈注引京房易傳海出巨魚邪人進賢人疏 衛侯廬漕 左氏宣二年傳狄人伐衛衛師敗績立戴公以廬於漕

小畜

衿帶解墮

案唐詩昨夜裙帶解今朝蟬子飛

離

授吾龜鈕

翟云漢官儀列侯黃金龜鈕文曰印丞

相黃金龜鈕文曰章

天壯 元冥厭火消散瓦解 禮記月令其神元冥注水神也少昊子曰修曰鰥爲水官言水能剋火也

萃 烏孫氏女深目黑醜 漢書西域傳烏孫國大昆彌治赤谷城去長安八千九百里又曰自宛以西至安息國其人皆深目多須頰貴女子女子所言丈夫乃決正自烏孫以西至安息近匈奴

困 二女寶珠誤鄭大夫 初學記漢水引韓詩鄭交甫過漢皋遇二女妖服佩兩珠交甫與之言曰願請子之佩二女解珮與交甫而懷之去十步探之卽亡矣卽願二女亦卽亡矣劉向列女傳游女漢水神鄭大夫交甫於漢水見之文選南都賦游女弄珠於漢皋之曲注引韓詩外傳鄭交甫將南適楚遵彼漢皋臺下遇二女珮

兩珠大如荆雞之卵

艮 鬱快不明 毛本快作映

漸 鷓鴣鴝鴒治成禦災周公勤勞綏得安家 毛本作

鷓鴣字之誤也大畜之蹇云鷓鴣鴝鴒治成禦災綏德
安家周公勤勞毛詩序鷓鴣周公救亂也傳鷓鴣鷓鴣
也毛本爾雅釋鳥文文選陳琳檄吳將校部曲注引韓
詩鷓鴣鳥名也鷓鴣所以愛養其子者適以病之

巽 東家殺牛汚吳腥臊神皆西顧命衰絕周 睽之明

夷云神皆西顧命絕衰周漢書郊祀志引易東鄰殺牛
不如西鄰之禴祭顏注東鄰謂商紂也西鄰周文王也
班固幽通賦東公虐而殲仁應劭曰東鄰紂也師古曰
公古鄰字隸釋孫根碑至於東叩大虐殲仁聖武定周
封于之墓禮坊記鄭注亦云東鄰謂商紂西鄰謂周文

王也

兌 火起我後喜炙我廬蒼龍銜水泉噴屋柱 玉篇濕

濕水蘇因切謂噴水以滅火也濕與噴同後漢樂巴傳

注引神仙傳巴飲酒向西南噴之成都市失火因酒爲

雨以滅火火息雨皆酒臭既濟之恒云火起吾後喜炙

我廬蒼龍含水深噴吾柱

目案喜即鳥鳴語
諸之諸古字通

中孚 璚英朱草 玉篇瓊赤玉也璚同上朱本作瓊英

賁之第二十二

蒙 戴盆望天不見星辰 司馬遷報任安書僕以爲戴

盆何以望天隨之蹇云戴餅望天不見星辰

師 梗生荆山命制輪班 司馬相如子虛賦梗枿豫章

文選李善注引尸子土積則生梗枿豫章爾雅釋木楡

無疵郭注楡梗屬似豫章正義梗及孫章皆南方大木

之名也釋文榎鼻縣反輸班卽魯之公輸子一本作輸班誤毛本乾之既濟亦云命制輸班

泰 昂畢附耳將軍乘怒 翟云史記天官書昂曰旄頭明星爲白衣會畢曰罕車爲邊兵主弋獵其大星旁有小星曰附耳附耳搖動主有譏亂臣在側

恒 亡其馭牛 爾雅釋畜駟白馭黃白驪郭注引詩駟馭其馬正義曰馬之毛色不純者此別其異名也說文馭色不純也晉書王獻之傳桓溫嘗使書扇筆誤落因畫作烏馭特牛

睽 不見雄英 宋本作英雄

損 澹澹磻磻 毛本作淡淡磻磻司馬相如子虛賦磻石相擊礧礧磻磻集韻磻磻同卽蓋切

益、旃裘苦蓋慕德厭服 震之豐云旃裘猶國文禮不

節史記蘇秦傳前裘狗馬之地國策作羶裘蔡文姬胡笳十八拍瓊裘爲裘兮骨肉震驚左傳昔秦人迫逐乃祖吾離於瓜州乃祖吾離披苦蓋蒙荆棘以來歸我先君毛本苦蓋作若閭

升 相如睨柱趙王危殆 事見史記藺相如傳

歸妹 張羅捕鳩鳥麗其災 案麗讀如雉離于羅之離周易離麗也釋名麗離也歸妹之節云張網捕鳩兔離其災

巽 蔡侯兩裘久苦流離 左氏宣二年傳蔡昭侯爲兩佩與兩裘以如楚獻一佩一裘於昭王昭王服之以享蔡侯蔡侯亦服其一子常欲之弗與三年止之

剝之第二十三

訟 井沸釜鳴不可安居 漢書成帝紀北宮井水溢出

楚辭瓦釜雷鳴晉書郭璞傳元帝令璞筮之遇咸之井
璞曰西南郡縣有陽名者井當沸其後歷陽縣中井沸
開元占經引郭璞洞林曰卷金施安上家金九鳴响旬
月中尋有九喪又引地鏡曰官中竈及金甌鳴者不出
一年大有喪君井湧沸宗廟失墜京房易候曰泉水沸
此謂賤人將貴王者不顧骨肉不親九族厥咎邑泉湧
沸藝文類聚引異苑句容縣有延陵季子廟廟前井及
濱恒自涌沸故名沸井於今猶然北堂書鈔引許氏易
災條曰井沸泥浮五色元黃卽隋志五行類許峻易史
條也宋史李濤傳濤免相歸第時中書廚金鳴者數四
揮塵後錄李金字元量淮水人其母誕彌之日庖下金
鳴甚可畏其父卽名之建中靖國龍飛遂魁天下

師

寒蟄不才

无妄之蠱云駭駕寒蟄日暮失時賈誼

弔屈原文騰駕罷牛驂蹇驢兮東方朔七諫駕蹇驢而
無策兮又何路之能極

比 明傷之初爲穆出郊以讒復歸名曰豎牛剝亂叔孫
餒於空耶 毛本餒作飢誤左氏昭五年傳昭子卽位
豎牛禍叔孫氏初穆子之生也莊叔以周易筮之遇明
夷之謙以示卜楚邱曰是將行而歸爲子祀以讒人入
其名曰牛卒以餒死案明夷傷也故曰明傷之初大壯
之比云明夷兆初三日爲災以讒復歸名曰豎牛剝亂
叔孫餒卒虛邱餒與餒同

謙 三婦同心 陳第毛詩古音考思下引三婦同夫

隨 沐猴冠帶盜在非位 宋本作獼猴漢書項籍傳韓
生曰人謂楚人沐猴而冠果然初學記引毛詩草蟲經
曰獼獼猴也楚人謂之沐猴大壯之屯云獼猴冠帶盜

載非位

蹇 陽虎脅主使德不通災離爲殃年穀患傷 左氏昭
二十七年傳孟懿子陽虎伐鄆定二年雉門及兩觀災
五年季平子卒陽虎將以璠璣欽七年陽虎欲去三桓
計陽虎脅君之曰正天災災火之時也